

Jangan tunggu lagi, tambah ilmu teknologi sekarang - Tun Mahathir
AstroAwani
19 Januari 2020
Hilal Azmi,

LANGKAWI: Perdana Menteri, Tun Dr Mahathir Mohamad mahu rakyat Malaysia terutamanya mereka yang berada di alam pekerjaan untuk menambah ilmu berkaitan teknologi bagi menghadapi revolusi industri.

Katanya, pendidikan menjadi aspek penting bagi membolehkan teknologi dimanfaatkan sebaiknya kepada keseluruhan masyarakat.

“Pendidikan dan pemahaman bidang teknologi tidak boleh tunggu lagi.

“Ia perlu ditekankan sekarang termasuk mereka yang berada dalam dunia pekerjaan,” katanya ketika berucap merasmikan Projek Demonstrasi 5G (5GDP) di Pusat Konvensyen Antrabangsa Langkawi pada Ahad.

Katanya lagi, menerusi 5GDP, banyak perkara baru akan dipelajari seiring dengan proses pembangunan teknologi komunikasi generasi kelima (5G) yang dijadual bakal dikomersialkan bermula suku ketiga tahun ini.

Pada masa sama, ketika ini lebih 100 projek 5GDP telah dijalankan merangkumi sembilan aspek meliputi bandar pintar, pertanian pintar, bidang pembuatan, penjagaan kesihatan digital, pendidikan, media dan hiburan, serta pelancongan pintar.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/jangan-tunggu-lagi-tambah-ilmu-teknologi-sekarang-tun-mahathir-228477>